

«Alla fin va i be per nov milliuns francs»

Gieus olimpics 2026: Discussiun al podium

DA GION NUTEGN STGIER / ANR

■ **Er sche la regenza saja ferm per quel project veglia quai na dir ch'ella saja betg er critica per Gieus olimpics en il Grischun en diesch onns. La garanzia da deficit da la confederaziun saja indispensabla per realisar l'occurrenza internaziunala en noss chantun.** La regenza in corpore, *Urs Marti*, il president da la citad da Cuira, *Paul Accola* e *Ruedi Weber*, dus anteriurs sportists, ha cumpiglià la runda dals promoturs per il project Olimpiada 2026 en il Grischun mardi saira en la chapitala grischuna. L'interess per l'occurrenza è cun radund 100 persunas preschentass segir stà plitost magher. Sche la regenza sa preschenta cumpletta al public, lura va i bain per ina chausa pli impurtanta, cas cuntrari sa mussa ella strusch en corpore. Manà la discussiun al podium ha *Urs Cadruvi* e quai en moda cumpetenta.

Gieus olimpics ina classa pli auta

Ruedi Weber, l'anterior sportist paralisa, ha ditg ch'il sport fascineschia blers ed el chaschunia per entusiassem e quai tar tuts. Emozions fetschian bain e quai en pliras modas. Tut quels aspects sajan d'attribuir er a Gieus olimpics. Quels sajan tuttina anc ina classa pli auta che campinadis mundials, ha punctuà *Weber*. *Paul Accola*, l'anterior skiunz e participant da Gieus olimpics, è da l'opiniun ch'ina occurrenza sportiva sco l'Olimpiada saja er la chaschun per promover la generaziun giuvna. «Da gudagnar saja simpel, dentant da perder, quai hajan tuts d'emprender», ha menziunà *Accola*.

Quant duai l'occurrenza custar?

In pau pli critic envers Gieus olimpics en noss chantun è stà *Urs Marti*, il president



La regenza unida quai che pertutga Gieus olimpics 2026 en il Grischun: *Christian Rathgeb*, *Jon Domenic Parolini*, *Barbara Janom Steiner*, *Mario Cavigelli* e *Martin Jäger* (da san.).

FOTO G. N. STGIER

da la citad da Cuira. Tuttina saja el persvas che er Cuira profitassia ferm da quel event da sport. *Marti* è persvadì che la valur da creaziun per Cuira saja en la fasa da preparaziun pli gronda che durant ils Gieus olimpics sez. Grazia als eventuals projects per implants e plazzas da sport a Cuira segir er pli svel. *Marti* ha accentuà che da gronda impurtanza saja lura da savoir quant che l'Olimpiada duai custar per Cuira e per il chantun, quai che saja actualmain betg enconuscent.

Gronda experientscha

Cusseglier guvernativ *Jon Domeic Parolini* ha cunzunt fatg attent al basegn necessari d'in svilup economic en noss chantun. Quai vala cunzunt per ils lieus turistic e per intginas regiuns a la periferia. Gieus olimpics sajan in schanza per dar a l'economia novs impuls e per promover l'innovatività, ha punctuà *Parolini*. Ultra da quai ha el ditg ch'il Grischun haja gronda experientscha cun organisar events da sport internaziunals, quai che saja ina garanzia per pudair organisar en

nov onns ils Gieus olimpics d'enviern en il Grischun.

Nagin ristg finanziel

Barbara Janom Steiner, la presidenta da la regenza, ha cunzunt ditg che senza ina garanzia da deficit davart da la confederaziun e da singulas pretendiuns da vart dal chantun al Comité olimpic internaziunal saja la regenza cunter quel project. «Nus na vulain nagin ristg finanziel», ha ditg la schefa dal Departament da finanzas dal Grischun. Ella ha er ditg che a la

finfinala decida il suveran grischun ils 12 da favrer 2017 per in credit da «be» nov milliuns francs, er sche la summa muntia a 25 milliuns francs, quai pervia da la lescha da finanzas. Da la summa da 25 milliuns francs è prevì che la confederaziun e Swiss Olympic surpiglian mintgamaì otg milliuns francs ed ils auters nov milliuns il Grischun.

Strusch problems tar il traffic

Cusseglier guvernativ *Mario Cavigelli* ha ditg en la discussiun che er cun Gieus olimpics fissia il chantun pront quai che pertutga il traffic. Cun, ubain senza, ina uschè gronda occurrenza la fasa da planisaziun per projects da vias saja oz gia tar sis fin set onns. Ch'il Grischun saja abel d'ademplier las pretaisas da segirtad conferma bain il Forum mundial d'economia da Tavau, ha menziunà cusseglier guvernativ *Christian Rathgeb*. Segir fissan Gieus olimpics er or da quella vista ina vaira sfida per il chantun. Il minister da sport, cusseglier guvernativ *Martin Jäger*, ha cunzunt fatg attent a la muntada dal sport en il Grischun, in chantun che viva dal success da noss sportists e nossas sportistas e che viva cunzunt dal sport d'enviern.

Adina be l'Engiadina

In preschent ha manegià ch'il project Gieus olimpics 2026 en il Grischun saja davart dals promoturs plitost in sfurzim che ina persuasiun e quai saja tut auter che favuraivel en vista a la votaziun en trais emnas. Quai che pertutga la decentralisaziun da l'Olimpiada en nov onns en noss chantun saja dad ir sur ils cudeschs, ha ditg in *Sursilvan*. Integar pli fitg la *Surselva* e quai betg mo *Laax*, ma bain er *Sedrun* e *Mustér*. Adina saja be l'Engiadina en il center e quai saja ingist, ha ditg il signur.